



UPM Hub Latihan Guru Bahasa Inggeris – Naib Canselor



Datuk Naib Canselor ketika menyampaikan ucapan perasmian pada ICELT 2009 di Hotel Equatorial, Melaka.

Melaka, 10 Nov – Universiti Putra Malaysia (UPM) yang merupakan universiti pertama di Malaysia menawarkan subjek Pengajaran Bahasa Inggeris sebagai Bahasa Kedua (TESL) kini mengorak langkah untuk menjadi hub latihan kepada guru-guru Bahasa Inggeris.

Naib Canselor UPM Prof. Datuk Dr. Nik Mustapha R. Abdullah berkata dalam usaha menuju ke arah itu, UPM memerlukan tenaga pengajar tempatan dalam melahirkan sistem pengajaran dan penyelidikan TESL bertaraf dunia.

“UPM juga perlu menambah jumlah tenaga pengajar asing yang dikenali dalam bidang pengajaran Bahasa Inggeris memerlukan kurikulum yang lebih baik dari negara-negara maju yang lain,” katanya ketika merasmikan *The International Conference on English Language Teaching (ICELT 2009)* di Hotel Equatorial, Melaka.

Menurut Pengerusi ICELT 2009, Prof. Madya Dr. Jayakaran Mukundan, persidangan antarabangsa itu penting dalam menghimpunkan ahli akademik seluruh dunia untuk berkongsi idea dan hasil kajian mengenai pengajaran-pembelajaran Bahasa Inggeris.

Beliau berkata UPM berbesar hati menerima penceramah berpengalaman dari dalam dan luar negara untuk berkongsi kepakaran dan teknik dalam pengajaran-pembelajaran Bahasa Inggeris.

Antara penceramah dalam persidangan itu ialah Annie Hughes (University of York), Barry Tomalin (University of Westminster), Carolyn Graham (Harvard), Fatimah Hashim (University of Malaya), Hitomi Masuhara, Saleh Salim Al-Busaidi (Oman), Brian Tomlinson (Leeds Metropolitan University), Alan Maley (Assumption University), David Nunan (California), Ghazali Mustapha (University of Leicester, England) dan Rahma Ibrahim Al-Mahrooqi (Oman).

ICELT yang dianjurkan oleh Pusat Sumber, Fakulti Pengajian Pendidikan UPM berlangsung selama dua hari dengan menghimpunkan seramai 250 pembentang kertas kerja serta penceramah dari lebih 20 buah negara.

Majlis turut menyaksikan 3 penerima biasiswa, iaitu Irawaty Herlina Md. Solehan, 25, yang menerima biasiswa Tun. Dr. Mahathir ELS-TESOL Internship Scheme, Abdullah Omar, 25 (Tun Dr. Mahathir UPM-ELS Awards) dan Muhammad 'Uthman Omar, 20 (Tun Dr. Mahathir UPM-ELS Awards).



Penerima biasiswa, dari kiri Abdullah Omar, Irawaty Herlina Md. Solehan dan Muhammad 'Uthman Omar berkongsi kegembiraan.

Berita ini disediakan oleh Seksyen Media, Publisiti dan Penerbitan UPM.